





# ДЕПУТАТ – ХАЛЫҚТЫҢ ТІЛІ



**Биыл еліміз жергілікті мемлекеттік басқарудың құрамдас бөлігі, жергілікті өкілді органдар – мәслихаттардың құрылғанына 30 жыл толып отыр. Осы уақыт аралығында жергілікті мәслихаттағы депутаттар халық пен билік арасында дәнекер болып, халықтың әлеуметтік жағдайын жақсарту бағытында аянбай қызмет етуде.**

«Жалпы, депутат дегеніміз – халық қалаушысы. Халықтың қоғамдағы талабы мен тілегі, мүддесі мәслихатқа депутат арқылы жетеді. Халықтың бүгінде өзіндік көзқарасы бар, саяси сауатты, бәрінен хабардар. Елдегі оқиғаны жақсы біледі. Шын мәнінде депутаттың жұмысында қиындық та аз емес. Негізделіп келген нәрселерді тәжірибе жүзінде қолданып, халықтың көңілінен шығуы қажет. Екеуін де жымдастырып, бірдей етіп шығару оңай мәселе емес. Ал, халықтың сенімі деген – үлкен жауапкершілік. Осындай асқан жауапкершілікпен қызмет атқарып келе жатқан Тайынша аудандық мәслихатының

депутаттары биылғы «Қазақстан мәслихаттарына 30 жыл» мерекесі қарсаңында біршама айтарлықтар іс – шаралар атқарды.

Тайынша қаласының дене шынықтыру-сауықтыру кешенінің аренасында ерлер командалары арасында волейболдан аудандық турнир өтті.

Турнирдің мақсаты – волейбол ойынын насихаттау, спорттық шеберлікті арттыру, командалар арасындағы достық қарым-қатынасты нығайту және салауатты өмір салтын насихаттау болып табылады. Турнирге ауылдық округтер мен Тайынша қаласынан 11 команда – Донецк, Яснополян, Алабота, Чкалов, Зеленогай, Киров, Чермошнян, Летовочный, Келлер ауылдық округтері және Тайынша қаласынан екі команда қатысты. Турнирдің салтанатты ашылуында жарысқа қатысушыларға 8-ші шақырылымдағы мәслихат депутаттары А.Нұрахмет, А.Әбдірахманова, 5, 6-шы шақырылымдағы аудандық мәслихат хатшысы, Тайынша қаласының волейбол қозғалысының белсендісі Қ. Шәріпов және 1994-1999 жылғы 1-ші шақырылымдағы Красноармейск аудандық мәслихатының депутаты, Тайынша қаласының волейбол құрама команданың мүшесі И.Тулицин сөз сөйледі.

Мемлекеттік туды көтеріп, мемлекеттік Әнұранды ұжымдық орындағаннан кейін жарыстың бас төрешісі В.Новицкий таңдау нәтижелерін айтты. Жарыс күнінің қорытындысы бойынша «Тайынша - 1» командасы жеңіске жетті. Мәслихат депутаты А.Әбдірахманова жеңімпаздарға 60 000 теңге сомасына сертификат, кубок және диплом табыс етті. Екінші орын «Вишневка» командасында. Мәслихат депутаты А. Нұрахмет 40 000 теңге сомасына сертификат, кубок табыстады. Үшінші орынды «Донецкое» командасы алды. Мәслихат төрағасы С.Бекшенов 20 000 теңге сомасына сертификат, кубок табыс етті. «Үздік байланыстырушы» номинациясы бойынша кубок пен диплом «Тайынша-1» командасынан А. Мыңбаевқа табысталды. «Үздік шабуылшы» номинациясы бойынша кубок пен диплом «Тайынша-1» командасынан В.Шульғаға табысталды. «Ең техникалық» номинациясы бойынша кубок және диплом «Донецкое» командасынан А. Шишковскийге берілді.



## МЕРЕЙТОЙҒА ОРАЙ: 30 ИГІ ІС.

Тайынша аудандық мәслихатының құрылғанына 30 жыл толуы қарсаңында 8-ші шақырылым депутаттары «30 игі іс» қайырымдылық акциясына бастамашылық жасады. Акция аясында ауданымыздың 31 отбасына, оның ішінде көпбалалы және толық емес отбасыларына, мүгедек балаларды тәрбиелеп отырған отбасыларына, депутаттар өз сайлау учаскелері бойынша жеміс себеттерін үйлеріне жеткізді.

Ұйымдастыру комитеті және сыйлық себеттерін алған отбасылар сегізінші шақырылымдағы мәслихат депутаттары А.Абдрахмановаға, С.Бекшеновке, Л. Журавлеваға, Ю.Красногоровыйға, Г.Купербаеваға, А.Нұрахметке, Д. Рсаеваға, А.Сарницкийге акцияны өткізуге көрсеткен материалдық көмегі үшін алғыс білдіреді.

## ЕРЛІК ІС - ЕШҚАШАН ҰМЫТЫЛМАЙДЫ

15 ақпан қаза тапқан ауған жауынгерлеріне арналған мемориалда Кеңес әскерлерінің Ауғанстаннан шығарылғанына 35 жыл толуына орай гүл шоқтарын қою рәсімі өтті. Іс-шараға аудандық мәслихат төрағасы С. Бекшенов, аудандық полиция бөлімінің бастығы, полиция полковнигі Н.Ақтанов, аудандық ардагерлер кеңесінің төрағасы А. Рафальский және Ауған соғысының ардагерлері қатысты.

Жиналғандар әскери борышын орындау кезінде қаза тапқандарды бір минут үнсіздікпен еске алды, содан кейін үш әктілі қару-жарақ атылды.

Бұл күні аудандық кітапханада мәслихат төрағасы С. Бекшенов Ауған соғысының ардагерлерімен кездесіп, қатысушыларға мерейтойлық медальдар табыс етті.

## КӨЛІ ЖОҚ ЖЕРДІ ҚАЛАЙША «ОЗЕРНОЕ» ДЕП АТАЙДЫ...

Сөзді тұрасынан бастасақ, бұрынғы Көкшетау облысы Чкалов ауданында (қазіргі Солтүстік-Қазақстан облысындағы Тайынша ауданы) «Озерное» дейтін шағын село бар. Ол селоның қысқаша тарихы мынандай: 1950 жылдардың басында Чкалов ауданындағы «Красная звезда» колхозына «30 лет Казахстана» колхозынан жалға (аренда) жер бөлінді. Сол жерге колхоз орталығы Донецкое селосынан бірнеше отбасы көшіп келіп қоныстана бастады...

Сөйтіп, жаңа село пайда болды. Селоны «Озерное» деп атады. Не себептен оған кім осындай ат бергені белгісіз. Өйткені, ол жерлерде шағын көлшіктер болмаса «Озерное» деп атайтындай көл болған жоқ. Осы жолдардың авторы сол жердің тумасы болғандықтан, көктемде қайтқан құстар келіп қонатын көлшіктер мен шалшық сулардан басқаны көрмеген. Қазір ол жерде кішкентай көлшік те жоқ. Селоның негізгі тұрғындары неміс болғандықтан ауызекі «Маленькая Германия» деп те атайтын...

Соңғы жылдары неміс ұлтының көпшілігі Германияға көшкені белгілі. Олардың орнына қандас оралмандар, басқа ауылдардан қоныс аударғандар келді. Алғашқы қоныстанғандардан ешкім қалған жоқ десе де болады. Мұның өзі осы бір шағын селоның атын өзгертуді сұрап тұрғандай...

Қазіргі таңда біз көтеріп отырған бар мәселе мында тұр. Бұл селодан 4 шақырым (км) жерге колхоздастыру кезінде «Жаңатілек» ауылы 1927 жылдан қоныс тепкен болатын. Бұл жерлер ежелден Қабанбай – Қыпшақ руларының ата жұрты. Әрбір қайыңды шоқтың, ескі жұрттардың өз атаулары бар. Қазіргі «Озерное» селосы осы «Жаңатілектің» жерінде. Басында «Жаңатілек» колхозы, соңынан «30 лет Казахстана» колхозының учаскасы, кейіннен Абай атындағы совхозға қарады. «Келешегі жоқ» деген ауылдар тізіміне ілегіп, 1975 жылы соңғы үй совхоз орталығы Қарағаш ауылына көшті. Ауыл орнында жетімсіреп дара шыққан жалғыз қарағай мен ата-бабалар зираты қалды...

Бұл күндері негізсіз қойылған орысша атаулардың орнына тарихқа байланысты қазақша атаулар берілген кезде, Президент Қасым-Жомарт Тоқаевтың бастамасымен «Жаңа Қазақстан» боламыз деп жатқанда маңында көлшік те жоқ «Озерное-ның» атын жаңартып «Жаңатілек» десек орынды болар еді деген үміттеміз...

Біз, тарыдай шашылып, әр жерге қоныстанған, бұл күнде 100-ден аса «жаңатілек» отбасы бармыз. 2021 жылы ауылдың орнына ескерткіш-стелла орнаттық. «Қызыл қайың» - Жаңатілек» атты ауыл тарихын баяндайтын кітап шығардық. Ауыл жұртында бас қосқанда (100-ден аса адам) «Жаңатілек» атын «Озерное» селосына беруді жоғары жақтан сұрау керек деген ұсыныс қабылдап ек. Көпшілік «тамаша ұсыныс» деп бір серпіліп қалып еді...

Осы орайда Солтүстік-Қазақстан облысы мәдениет, тілдерді дамыту және мұрағат ісі басқармасындағы ономастика комиссиясына өтініш жолдап «Озерное» - ның орнына «Жаңатілек» деп ресми түрде бекітуін сұрап отырмыз.

Егер шынында да «Озерныйдың» жанында көл болып, қазіргі көптеген көлдердей жекеменшік иесі болса, балығы шоршып, немесе жақсы бір демалатын орын болса, көпшілікке игілігін тигізіп жатса, «Озерное» болып тұра берсін дер едік. Ендеше ен далада көлі жоқ жерді «Озерное» деп атаудың өзі ерсі емес пе?..

Айта кеткен жөн, осы «Жаңатілек» шағын ауылынан 50-ден аса азамат Ұлы Отан соғысына аттанып, солардың 13-і ғана елге оралған. Соғыс болмағанда біз жанайқайымызды осылай жаймас та едік, қайыңды алқапқа қоныс тепкен ауылмыздың іргесі сөгілмес те еді.

Совет БАЛТАБАЙ,

Қазақстан Журналистер одағының мүшесі.

